

Dithero tsa Tirelano mo Kutlwanong

Thero ka Sontaga wa 3 morago ga moletlo waEpifania, e le ka 22. 01. 2012

09/2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 228 - 214/222

2. **Thapelo:** Morena Modimo, Rara yo o mo legodimong, re fa pele ga gago kajeno go utlwa Lefoko la gago. Re a leboga, ka o re neile Morwao Jesu Keresete gore e nne thuanho ya maleo a rona, a be a bonatshege mo ditšhabeng tsoitlhe, fa e le Mopholosi wa batho botlhe. Morena, le jaanong, fa re reetsa Lefoko la gago, o re fe Mowa o o Boitshepo wa gago gore re amogele Mopholosi wa rona ka tumelo, re mo ikanye, fa e le Mopholosi wa rona jaanong le ka bosakhutleng, ka ene Jesu o re utlwe. Amen.

3. Epistolo ka fa thulaganyong ya 2 e kwadilwe mo go Baroma 1:14-17;
Efangele ka fa thulaganyong ya 1 e kwadilwe mo go Matheo 8:5-13.

4. A go ipolelwe tumelo ya bokeresete!

5. Sefela sa 209 - 193/202

6. Thapelo ya mmadi wa thero.

7. **Lefoko** ka fa thulaganyong ya 4 e kwadilwe mo go

2 Dikgosi 5:1-19a, e re: "Naemane molaodi wa mephato ya kgosi ya Siria e ne e le monna yo mogolo fa pele ga mong-wa-gwe, e le motlotlegi; gonne MORENA o ne a neile Basiria phenyo ka ene. Mme monna yoo wa mogale o ne a bolawa ke lepero. Jaanong Basiria ba kile ba bolola ba le makoko, ba thopa mosetsana yo monnye mo lefatsheng la Iseraele; ene a nna lelata la mosadi wa ga Naemane. Mme a raya mohumagadi wa gagwe a re: 'Ao! Fa mong wa me a ka bo a le kwa go moporofeti yo o kwa Samaria, foo ene o ka bo a tlosa lepero mo go ene.' Ke fa Naemane a tsena, a bolelela morena wa gagwe a re: 'Mosetsana yo o tswang kwa lefatsheng la Iseraele o buile jaana le jaana.' Mme kgosi ya Siria ya re: 'Tsamaya o ye teng, ke tla romela kgosi ya Iseraele lokwalo.' A tsamaya a tshotse ditalente di le some tsa selefera le dišekele di le 6000 tsa gouta le diaparo di le some tsa mokgabo; a isa lokwalo loo kwa kgosing ya Iseraele lo lo reng: 'Jaanong fa lokwalo lo, lo fitlha koo go wena, o itse gore ke romile Naemane motlhanka wa me koo go wena gore o tlose lepero mo go ene.' Ya re kgosi ya Iseraele e buisa lokwalo loo, ya ikgagola diaparo ya re: 'A ke Modimo go ka bolaya le go ka tshedisa, fa yoo a roma go nna gore ke golole monna mo leperong? Nyaya! Lo ka lemoga, lwa bona fela gore o batla go lwa le nna.' Ya re Elisa monna wa Modimo a utlwa go tse: Kgosi ya Iseraele e ikgagotse diaparo! A roma kwa kgosing a re: 'Ke ka ntlha ya eng fa o ikgagotse diaparo? A a tle kwa go nna gore a itse, fa go na le moporofeti mo Iseraeleng.' Naemane a tla ka dipitse tsa gagwe le ka dikoloi tsa gagwe, a ema fa mojakong wa ga Elisa. Mme Elisa a roma morongwi a re: 'Yaa o tlhape gasupa mo Joretane, foo mmele wa gago o tla go boela, mme o itsheka.' Ke fa Naemane a galefa a tsamaya a re: 'Kana ke ne ka re: o tla tswa ka esi a ema, a bitsa leina la MORENA, Modimo wa gagwe, a kgadikanya letsogo godimo ga felo fa go leng lepero, a tlosa lepero jalo. Dinoka tsa Damaseko tsa Abana le Farephare a ga di phale metsi aotlhe a Iseraele? A ga nka ke ka tlhapa mo go tsona ka itsheka?' Mme a hulara a tsamaya a ngadile. Mme batlhanka ba gagwe ba mo atamela, ba bua nae ba re: 'Rra, fa moporofeti a ka bo a go laetse go dira se segolo, a o ka bo o sa se dire? Bogolo jang, ka a go laetse fela a re: 'Tlhapa, mme o tla itsheka!'' Ke fa a fologa, a ikina gasupa mo Joretane ka fa lefokong la monna wa Modimo. Mme nama ya gagwe ya boa, ya tshwana le nama ya mosimanyana, a itsheka. Jaanong a boela kwa monneng wa Modimo ene le lesomo lotlhe la gagwe, a tla a ema fa pele ga gagwe a re: 'A ko o bone, ke lemogile gore ga go na Modimo mo lefatsheng lotlhe, fa e se mo Iseraeleng fela. Jaanong he, a ko o amogele mpho ya tebogo mo motlhankeng wa gago.' Mme Elisa a re: 'Ka botshelo jwa MORENA yo ke mo direlang! Ga ke ne ke e amogela.' Le fa a mo emelela go e tsaya, a gana. Ke fa Naemane a re:

‘Le fa go sa nna jalo, ka thapelo a motlhanka wa gago a fiwe mmu o o ka rwalwang ke meboulwe e le mebedi. Gonne motlhanka wa gago ga a kitla a tlhola a direla medimo e sele ditlhabelo tsa phiso le ditlhabelo tse di jewang, fa e se MORENA fela. Fela a MORENA a itshwarele motlhanka wa gago mo selong se fa ya re mong wa me a tsena mo ntlolong ya ga Rimone go obamela gona, a ikaega ka letsogo la me, le nna ke ikobe mo ntlolong ya ga Rimone, fa ene a obamela mo ntlolong ya ga Rimone; a MORENA a itshwarele motlhanka wa gago mo selong se.’ A mo raya a re: ‘Tsamaya ka kagiso!’” Amen.

8. Thero: Phuthego e e rategang ya Morena wa rona Jesu Keresete, re mo sebakeng sa Epifania, se e leng sebaka sa ponatshego ya Mopholosi wa rona Jesu Keresete mo go baditšhaba. Kajeno ke Sontaga wa 3 morago ga moletlo wa Epifania. Ee, phuthego, Jesu re mo tsaletswe kwa Betleheme, mme e se Mopholosi wa Bajuta fela, mme ke Mopholosi wa batho botlhe, ba merafe yotlhe. Ke Mopholosi wa me, ke Mopholosi wa gago. Phuthego, mafoko a thero ya kajeno re a bona mo lokwalong lwa bobedi lwa Dikgosi. Teng foo re buisa ka ga Elisa, monna wa Modimo, fa a ne a fodisa Naemane mo bolwetsing jwa gagwe jwa lepero. Ka moo a re utlweng Lefoko le legolo le le reng: **MORENA Modimo ke Modimo o o nang le thata.**

1. A re o ikanyeng,

2. re o leboge!

1. A re o ikanyeng! Barategi mo Moreneng, mo mafokong a thero ya kajeno re utlwa gore Naemane, kgosana ya ntwana ya kgosi ya Siria, e ne e le motho yo mogolo fa pele ga kgosi ya gagwe, e le yo o tlotlegileng, gonne MORENA o ne a naya Siria phenyo ka ene. E ne e le seganka tota, mme a bolawa ke lepero. Phuthego, gore re tlhaloganye sentle kgang eo, re tshwanetse go itse gore lepero ke bolwetsi jo bo ntseng jang. Ke jo bo maswe, jo bo tshelanang. Ke jo bo neng bo sa alafege mo sebakeng sele. Ke jo bo jang nama ya motho, bo e fetola go nna e tshweu fela. Motho yo o bolawang ke bolwetsi joo o ne a ntshiwa mo gare ga batho, a nne nosi gore a se ka a bo tsholele mo go ba bangwe. Go ne go ntse fela jalo. Go ne go ntse fela jalo ka Naemane, kgosana ya ntwana ya kgosi ya Siria. Re ka re: O ne a lwala sebaka, a ntse a bolawa ke lepero. Ka gongwe o ne a setse a lekile go bona thuso, botshelo jwa gagwe bo ntse bo tlatloga, bo ntse bo fologa, mme ga a ka a bona thuso. Lepero le ne le tswelela fela. Phuthego, MORENA Modimo ke Modimo o o nang le thata. A re o ikanyeng! Phuthego, kwa re paletsweng teng Modimo ga o palelwe. Kwa go leng lefifi teng mo go rona, fa re sa tlhole re bona lesedi, Modimo o nonofile go re sedimosetsa. Kwa re latlhegelwang teng ke tsholofelo, Modimo o e tla, o tsoseletsa tsholofelo, balwetsi ba tsoge, ba tshole.

Phuthego, re utlwa ka ga Basiria gore: “Jaanong Basiria ba kile ba bolola ba le makoko, ba thopa mosetsana yo monnye mo lefatsheng la Iseraele; ene a nna lelata la mosadi wa ga Naemane. Mme a raya mohumagadi wa gagwe a re: ‘Ao! Fa mong wa me a ka bo a le kwa go moporofeti yo o kwa Samaria, foo ene o ka bo a tlosa lepero mo go ene.’ Ke fa Naemane a tsena, a bolelela morena wa gagwe a re: ‘Mosetsana yo o tswang kwa lefatsheng la Iseraele o buile jaana le jaana.’ Mme kgosi ya Siria ya re: ‘Tsamaya o ye teng, ke tla romela kgosi ya Iseraele lokwalo.’ A tsamaya a tshotse ditalente di le some tsa selefera le dišekele di le 6000 tsa gouta le diaparo di le some tsa mokgabo; a isa lokwalo loo kwa kgosing ya Iseraele lo lo reng: ‘Jaanong fa lokwalo lo, lo fitlha koo go wena, o itse gore ke romile Naemane motlhanka wa me koo go wena gore o tlose lepero mo go ene.’ Ya re kgosi ya Iseraele e buisa lokwalo loo, ya ikgagola diaparo ya re: ‘A ke Modimo go ka bolaya le go ka tshedisa, fa yoo a roma go nna gore ke golole monna mo leperong?’ Phuthego, MORENA Modimo o na le thata, a re o ikanyeng! “Ya re Elisa monna wa Modimo a utlwa go twe: Kgosi ya Iseraele e ikgagotse diaparo! A roma kwa kgosing a re: ‘Ke ka ntlha ya eng fa o ikgagotse diaparo? A a tle kwa go nna gore a itse, fa go na le moporofeti mo Iseraeleng.’ Naemane a tla ka dipitse tsa gagwe le ka dikoloi tsa gagwe, a ema fa mojakong wa ga Elisa. Mme Elisa a roma morongwi a re: ‘Yaa o tlhape gasupa mo Joretane, foo mmele wa gago o tla go boela, mme o itsheka.’” Ke fa re utlwa gore “Ke fa Naemane a galefa a tsamaya a re: ‘Kana ke ne ka re: o tla tswa ka esi a ema, a bitsa leina la MORENA, Modimo wa gagwe, a kgadikanya letsogo godimo ga felo fa go leng lepero, a tlosa lepero jalo. Dinoka tsa Damaseko tsa Abana le Farephare a ga di phale metsi aotlhe a Iseraele? A ga nka ke ka tlhapa mo go tsona ka itsheka?’ Mme a hulara a tsamaya a ngadile.” Ke gore Naemane o ne a batla go bona se se gakgamatsang gore a solofele, fa a tla

fofa. Fa a ne a utlwa gore a tlhabe mo nokaneng ele, ga a ka a ikanya, le e seng go dumela. Mme re a utlwa gore “Rra, fa moporofeti a ka bo a go laetse go dira se segolo, a o ka bo o sa se dire? Bogolo jang, ka a go laetse fela a re: ‘Tlhapa, mme o tla itsheka!’” Phuthogo e e rategang, MORENA Modimo ke Modimo o o nang le thata, a re o ikanyeng! Phuthogo, boikanyo ke jo, jo bo tsogileng mo go Naemane. Re utlwa gore o ne a dira se badiredi ba gagwe ba se mmoleletseng, a dira, jaaka Elisa a mo laetse. “A fologa, a ikina gasupa mo Joretane ka fa lefokong la monna wa Modimo. Mme nama ya gagwe ya boa, ya tshwana le nama ya mosimanyana, a itsheka.” Tota, MORENA Modimo o na le thata, a re o ikanyeng, gonne ga o palelwe ke sepe. Bomorwa-Rre, bomorwadie-Rre, go ntse jang mo go rona? Mo malwetsing a rona a mefutafuta a a re tlhaselang kajeno, a re ikanya Modimo gore ke Modimo o o nang le thata? Bolwetse jo bo sa alafegeng ke jo: Ke raya Aids, jo bo bolayang batho ba dikete mo lefatsheng. Wayi! Ke mang yo o tla re alafang? Ga go na ope, fa e se ene yo e leng Mopholosi Jesu Keresete. Phuthogo, a ga re tlhole re mo ikanya? Gongwe le rona re batla go bona dikgakgamatso le dithata tse dikgolo jaaka Naemane? Moporofeti wa Modimo a bua fela a re: “Yaa o tlhabe gasupa mo Joretane, foo mmele wa gago o tla go boela, mme o itsheka.” Naemane o ne a tloga a sa ikanye, mme a fologa, a tlhapa, a itsheka. Fela jalo Jesu o buile, a bolelela sefoku sele, a re: “Tsamaya, o tlhabe mo bodibeng wa Siloame!” Sa ikanya, sa ya, sa tlhapa, sa bona. Go ne go ntse fela jalo mo banneng bale ba ba lesome ba lepero, Jesu a ba raya, a re: “Tsamayang, lo itshepe mo baperesiting ba bagolo!” Ba tsamaya, ba ntse ba tsamaya, ba itsheka, ba tshela. Bomorwa-Rre, bomorwadie-Rre, a re se ka ra belaela, mme re ikanye gore MORENA Modimo o na le thata. Mo malwetsing a mefutafuta a rona a a re tlhaselang kajeno a re tlhapeng mo bodibeng jo e leng thapelo, re tlhabe mo nokeng ya thapelo, le mo bolwetsing joo jwa lepero jo bo mo dipelong tsa rona, ke raya bolele, a re tlhapeng, re itshekiswe mo mading a Mopholosi wa rona Jesu Keresete, jaaka re setse re tlhapisitswe mo kolobetsong, re itshwarelwe mo maleong otlhe a rona, re pholoswe, re nne le botshelo jo bo sa khutleng. Ke nnete, thapelo e fodisa yo o lwalang, Morena a mo tsose, a be a itshwarelwe maleo a gagwe. A re utlweng le thuto ya bobedi e e reng:

2. MORENA Modimo ke Modimo o o nang le thata, a re o lebogeng! Barategi mo Moreneng, mafoko a bofelo a Lefoko la thero ya kajeno a re biletsa mo go lebogeng Modimo, a re: “Jaanong a boela kwa monneng wa Modimo ene le lesomo lotlhe la gagwe, a tla a ema fa pele ga gagwe a re: ‘A ko o bone, ke lemogile gore ga go na Modimo mo lefatsheng lotlhe fa e se mo Iseraeleng fela. Jaanong he, a ko o amogele mpho ya tebogo mo motlhankeng wa gago.’” Ya re Naemane a sena go itsheka mo bolwetsing jwa gagwe, a boela mo moporofeting Elisa gore a mo leboge, a re: “A ko o amogele mpho ya tebogo mo motlhankeng wa gago.” Mme Elisa o ne a gana go amogela kabelo eo, le fa a ne a mo kopa tota, ga a ka a dumela. Moporofeti Elisa a lemoga gore thata ya go fodisa Naemane mo leperong la gagwe ga e a tswa mo go ene, mme a tswa mo Modimong, jaaka Naemane a ipolela a re: “Ga go na Modimo mo lefatsheng lotlhe fa e se mo Iseraeleng fela.” Bomorwa-Rre, go ntse jang mo go rona? A rona re ba ba lebogang Modimo o o re abetseng botshelo mo mmeleng le mo moweng? Go ntse jang mo matshwenyegong, mo malwetsing, gongwe mo tlalelong ya loso? A re kopa mo Modimong o e leng ona gore o re abele botshelo, gongwe re kopa mo go ba bangwe? A re leboga Modimo o o re abelang botshelo, gongwe re leboga badimo? Nyaya, a go se nne jalo mo go rona, badumedi! Le rona a re ipoleleng jaaka Naemane, jaaka re mo utlwa a bua ka mafoko a thero ya kajeno gore “Gonne motlhanka wa gago ga a kitla a tlhola a direla medimo e sele ditlhabelo tsa phiso le ditlhabelo tse di jewang fa e se MORENA fela.”

A Modimo, Rara yo o mo legodimong, a a re thuse rotlhe, ba re sa ntseng re utlwa mafoko ao, a re abele Mowa o o Boitshapo gore le rona re ipolele mmogo le Naemane, re re: MORENA Modimo o na le thata. Ga go na Modimo ope mo lefatsheng kwa ntle ga ona. A le rona, mo ditlalelong tsotlhe tsa rona, tsa mmele, le tsa mowa, re mo ikanyeng, re be re mo leboge, ka e le ene Morena Modimo o o esi. A Modimo o re fe tse tsotlhe tseo ka bopelotlhomogi jwa ona. Amen.

9. Thapelo: Morena Modimo Mong wa thata yotlhe, re lebogela Lefoko la gago. Morena, kgorisa mewa ya rona ka lona, gonne Lefoko la gago ke botshelo. Morena, o re itshwarele maleo otlhe a rona, o re fe gore re simolole sešwa

go go ikanya, le go go leboga ka boikanyo jwa nnete, le ka tebogo ya nnete. Re kopa tse tsotlhe tseo ka ene Jesu Keresete yo o neng a re swela, a ba a re tsogela. Amen.

Thapelo ya Morena: Rara wa rona yo o mo legodimong ...

10. Sefela sa 202 - 187/195

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke F. J. Mtshali, ka ngwaga wa 2006/2011.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.